

Powšitkowne WOZJEWJENJA

njedźelu, 26. julija 2026

Nabožne wusyłanja w serbskim rozhłosu

Ewangeliske nabožne wusyłanje w Serbskim rozhłosu MDR ma tutu njedźelu, 26. julija, serbski superintendent Krystof Rummel z Hodźija. Wotkaz na nabožne wusyłanje w mediatece MDR je pod www.posol.de podaty.

Přiležnosť k swjatej spowědži w Róžeńće

W Róžeńčanskej hnadownej cyrkwi budže sobotu, 1. awgusta, wot 17.00 do 18.00 hodź. přiležnosť, sakrament wujednanja přijec. Spowědnicy budu kanonik Šćěpan Delan kaž tež fararjo Michał Anders, Gerat Warnar a Gabriš Nawka.

Putnikowanje křižerjow do Roma

Serbscy křižerjo, kotřiž chcedža so klětu na putnikowanju wot soboty do soboty, 1. do 8. meje, wobdźělić, móža so hač do póndžele, 31. awgusta, online přizjewić. To je na internetowej stronje www.posol.de kaž tež přez tule podaty QR-code móžno. Tam su tež nadrobne informacije podate.



Swjedźenski dzeń we Vilemovje ze serbskim podžělom

W sewjeročeskim Vilémovje (Wölmsdorf) spominaja lětsa na 300. róčnicu poswjećenja tamnišeje cyrkwy Marije donjebjeswzaća. Tole kaž tež 200lětnje wobstaće putnikowanja k swjatnicy, kiž měješe sčasami wobšěrny serbski podžěl, chcedža na swjedženju Marije donjebjeswzaća, sobotu, 15. awgusta, wopominać. Wosebje Łužiscy Serbja su na to wutrobnje přeprošeni. W zhromadnym džěle z Budyskim Serbskim muzejom pokazaja wustajeńcy „Prjedy hač woteńdžeš“ a „PRISMA. Žiwjenje při Klósterskej wodze.“ Tež historiske wobrazy k putnikowanju, mjez nimi z putnikami w serbskej narodnej drasće, móža sej wopytwarjo wobhladać. Wjeršk swjatočnosćow twori putniska Boža mša w 17.00 hodź. Hłowny celebrant budže arcybiskop Stanislav Přibyl z Prahi. Cyrkwinski chór Vilémova za tutu składnosć tež serbske kěrluše přihotuje. Po kemšach su wosadni a putnicy na zhromadny wjesny swjedzeń z pohosćenjom přeprošeni.

Ekumeniski dworowy swjedzeń w Hrubjelčicach

Serbske ewangeliske towarstwo a Maćijec swójba přeprošujetej wšitkich Serbow na lětnje pućowanje a serbski swjedzeń sobotu, 22. awgusta. Započatk je w 14.00 hodź. na Jaworkec/Maćijec dworje w Hrubjelčicach, Čěchorječanska 16. Wottam podadža so na pućowanje do wokoliny. Po tym budže na Jaworkec/Maćijec dworje kofej spřihotowany. Přizamknje so w 17.00 hodź. serbska ekumeniska nutrnosť z dekanom Witom Sćapanom a superintendentom Krystofom Rummelom. Wot 18.00 hodź. hač do nocy sćěhuje hudźba Drježdźanskeje kapaly Podka pod nawodom Jurja Čornaka. W bróžni budže bifej z jědźemi za hosći přihotowany. Štóż chce k tomu přinošować, njech něšto sobu přinjese. Přeprošeni su tež wšitcy, kiž chcedža hakle na nutrnosť abo program přińć. Při sylnym dešču zahaji so ekumeniske popołdno w 17.00 hodź. w bróžni na Jaworkec/Maćijec dworje.

Dobrowólne socialne lěto w zarjadnišćach Charity

Zajimcy wot 15 lět móža so za dobrowólne socialne lěto pola Zwjazka Charity w Drježdžansko-Mišnjanskim biskopstwje z.t. přizjewić, kotrež so wutoru, 1. septembra, zahaji. Započec móža pak tež pozdžišo. Městnosće dźěla su mjez druhim w biskopskej šuli Marije Montessori w Budyšinje, w Marije-Marćinym domje w Pančicach-Kukowje, w Chróšćanskim Domje swjateje Ludmile, w Kamjenskej Dźěłarni swjateho Mikławša abo w Smječkečanskim Domje swjateho Jana kaž tež w cyrkwinskih zarjadnišćach w Lipsku a Drježdžanach. Dobrowólne lěto přiliča so jako čakanski čas na studijne městno a płaci jako předpraktikum studija. Na měsac dóstanu wobdźělnicy 420 eurow kapsneho pjenjeza. Nimo toho njetřebaja sami přinošk za socialne zawěšćenje płacić. Službu wukonjeć měli dwanaće, znajmjeńša pak šěsć a maksimalnje 18 měsacow. Kóždy wutoru w 15.00 hodź. poskićuje Zwjazk Charity onlinowe informaciske popołdnjo. Za nje měli so zajimcy z mailku pod adresu fd@caritas-dicvdresden.de přizjewić. Tam dóstanu wšitke dalše informacije. Pod samsnymi wuměnjemi móža so tež dorosceni, kotřiž chcedža nowe dźěłowe perspektiwy zeznać, za to přizjewić. Wjace informacijow nańdu zajimcy pod www.posol.de.

Zaškleńčne molowanje

Dźěci wot staroby sydom lět móža wutoru, 11. awgusta, wot 10.00 do 12.30 hodź. w Budyńskim Serbskim muzeju zaškleńčne molowanje zeznać a nałožować. Krok po kroku nawuknu wosebitu wuměłsku techniku, tak zo nastanje na škleńcy hotowa molowanka. Přizjewjenja přijimuje Serbski muzej pod mailowej adresu ticket@sorbisches-museum.de abo telefonisce pod čisłom (0 35 91) 2 70 87 00.